

3487  
3815

終南漫錄  
全

BERKELEY  
LIBRARY  
UNIVERSITY OF  
CALIFORNIA



Carpentier



終南漫錄卷之一

士人崔仁浩吾王父守拙公謫居務安時主人子也  
自少來學吾家治舉子業逮吾輩長成猶間數年  
一往來來輒留連旬朔而去蓋吾家人也知生者  
宜莫如吾輩而猶不知其以醫名歲在壬辰余適  
往冰君錦城任所錦城與務不甚遠崔生聞余至  
來見叙寒暄迄生喟然曰吾少而業儒無成中年  
以後浪得醫名東西奔走殆無一日在家時豈不  
苦乎余笑曰君之醫無或生知耶何乃不學而能  
也蓋余未曾聞其曉解醫理故以此相戲而罷在



錦時稍稍聞人之譽生者而猶未信昨歲在完營時以慈患浹月憂煎而時適崔生來見留數日而去亦未曾論症問藥其不信生如此南中士夫家頗信用其言而林學士象德最信之今年自南搬還時與生偕入京未數月生名遂大播卿相士友家無不爭先邀去尤以其妙解脉度稱余遂恠焉一日邀生細叩其術以室人之病問之生卽命以二方曰用此方則某症可除用此方則某症可瘳余遂信之卽令製來今方逐日連服姑未知其效果如生言否而余之初不信生旣如彼今聞人之



譽從而信之又如此其中無定見一循外言者殊亦可笑姑此識之

燕京陝西有恠獸無頭無耳目口鼻臍下有長乳以此視以此食出入原野偷食穀草亦不傷人畜成卒異之刺以戈刃而不死逐之而不去窮逼之則自臍下若有聲焉而雲霧四塞成卒大驚潛踴其蹤而尋其穴其類甚多自陝西馳報燕京燕京亦不知爲何獸方頒問外國此盖古所謂恠物也無乃胡運將衰天故生此不祥之物以示其地耶抑天地之氣日就於凌夷消鑠萬物之恠無所不有



而狀耶抑中原真主將興而此為異祥耶皆未可知也如有博物之士當有以辨之矣

栗阡之新卜也雖事勢迫急不能極意廣求從容講

定而吾家素所信如河浩源

名澄

申伯翼

名戴華

李別

將厚根諸人皆以為可用伯翼以為此山雖不足

為大地結局則明白浩源初以為十分真的末則

曰不害為大地李別將所論居伯翼浩源之間其

所稱譽可知也以凡眼見之龍脉雖不能隆厚來

勢既甚軟美帶得生氣左右砂格亦且有情而處

於儒城大邑之內無虛濶散漫之態其局勢之不



至孟浪則無疑矣。肱而旣卜之後，議者或不無見毀之言。一則曰：此山水同歸元不結局。一則曰：後龍旣甚低微，結穴亦不分明，要之非大葬之地也。此兩言近頗盛行。日者林佐卽世，謙亦過路，登見其所論如上所云云。吾輩意亦不能無惑，更問於於申伯翼，則以爲大不肱。其開釋劈破甚明。伯翼素主水法者，而其言如此，則言者之言似不足取信。但所謂後脉低微之說，吾輩所見亦曾以此爲欠者也。伯翼雖不以爲病，而終不能釋肱。若使真知者論之，不知將何以爲言也。深恨吾輩無的見。



不能斷狀自信奈何奈何

栗阡在鎮岑地而乃王妣山所中窆處也

金汝常言近來鎮懷間人盛道栗阡之真妙雖稍解  
堪輿法者亦以為此後新卜湖右者未必踰於此  
此則過矣不足信狀無論知不知見人新卜之地  
譽者小而毀者多即通患也且山下居人朝夕過  
之而不知其為山見人忽狀用之未有不笑之矣  
而今此山近自山下之人遠至隣邑大抵毀小而  
譽多蓋其自古有云云故人亦慣聞而狀矣余遂  
對汝常曰鄉曲無見之人烏足以知其真為山真  
不為山狀願其心則猶不能無喜幸底意人情類



如是可笑

余於綱目前後再繙閱矣至漢唐紀則尤致力焉而甫閱一卷便已茫狀或略記其事而不省其人之名姓或記人名姓而不省其事之顛末蓋緣余才本駑鈍短於強記而實亦綱目浩漫難於領略而狀矣近又著工於此書披覽之餘輒抄寫其大略而一章之中必特書一人之名彙集其人事宗於其下者欲其便於考覽也逐章必空其餘者欲更閱本傳踵書之也其君臣問答之辭綱目則直曰上曰帝而必就其首段改以庙號者蓋一人有歷



事屢朝者欲其時代之分明也凡此特記誦之末爾固不足爲切察之工而今旣始寫役矣若不中輟則亦可見始終不怠之意而閑中披覽之暇將不無少補云爾

南書記聖重卽壺谷南尚書側室胤也曾於辛卯年以書記徃返日本而有所謂東槎錄者備載其踰中所經歷其風濤舟楫之險徃徃幾危者數矣使人見之凜然驚心況身親當之則其爲憂怕尤如何也今家嚴又當是役行期雖不迫近私情悶切願何可勝言狀國朝三百年來使价之徃返日域



者殆可歷數皆能利涉鯨海如履坦道此蓋由於  
王霸所暨也似不必深憂過慮於其間而且使年  
少而素無疾病者當之其航萬里之滄溟窮日出  
之絕域凡道路之所經覽者無非駭觀而爽襟者  
亦可謂浮世一壯遊也

東槎錄中又多載日本風俗大抵其人輕佻而奸黠  
薄阨而奢靡禮樂文物無足可觀蓋亦夷狄之國  
也然國富而兵強令行而禁止我國之於日本也  
以習俗文華論之則中國之與蠻貊也以敵國論  
之則有戰必不勝而已矣



近讀朱夫子書見其在南康縣時與丞相劄子蓋以政廢而民怨懇請其辭免而書中有曰自去秋來知舊徃來涉其境者問於道塗黃童白叟無不愁歎縮頰或苦其刑政之苛或病其征賦之重以至流聞遠邇亦莫不然貽書誚責提耳告戒者殆無虛日又曰一二月來國言逾甚士友之責逾深云云夫以朱子之道盛德備通變萬化而豈於區區一小縣乃致如許謗毀如許怨苦耶若以爲大賢人謙抑之辭則所謂貽書誚責等說非可以謙抑而假設者也其書又云以公狀申省自劾夫申狀



自効尤非謙也此恐是當時宗情也若以為朱子  
道大而南康小以不足為而廢之則此子游之所  
不為而朱夫子乃爾耶誠所未敢曉也

申正字維翰

以富文辭名於世已亥信  
使之行以製述官隨往焉

來見話間道

曾見山海經有云青耕鳥能禦癘因取而扁其堂  
曰青耕窩蓋近年癘患大熾中外同狀宗無可以  
避之故姑借此以寓辟瘟之義而是鳥不罕有於  
世故人見之未有曉其意者今夏是疾又熾有人  
圖是鳥印而賣之家家以為神方競取而揭諸門  
楣親見於數三處而其所印者雖與山海經所云



略有不同其辟瘟之意則蓋出於此矣未知誰所作  
俑而其由則似未必不自於我事甚可笑云云  
聞之殊異無論出於何人此蓋由於末世邀利之  
輩無所不用其極而狀矣此後不知何等恠異之  
事又有甚於此者乎

曾見漢書古今人表自伏羲至戰國人物分爲九等  
而其所品茅升降頗多乖謬若左丘明藺相如屈  
原諸人列於上中與孟顏等曾子則降之上下若  
是處甚多余竊駭之疑必有後之君子之論矣及  
見谿谷漫筆果以此爲品茅無据其言正與余意



相符噫班固特竇憲之狎客耳其處當世旣失其身況尚論古聖賢何能得其正乎無恠其見識之如此也偶閱谿谷遺集余所嘗親而此老先得之故漫書之

堪輿之術雖若有理其說本自微茫非聖賢所宜道也況又禍福之說尤是虛謊固達理者之所羞稱而朱夫子山陵議首尾數千言歷論古今山家之得失末又盛言禍福之理有若與臺史輩角勝負爭得失者雖其爲君親卜吉兆敬謹慎重無所不用其極而汎狀者之絕不類識理君子循經執常



之言誠未敢知也雖以夫子之論亦不能無疑故  
此識之

近有張師德者肅川座首也以堪輿爲業其求山也  
不待跨馬而出先問其主所將往之地輒閉眼默  
坐沉吟良久曰某地某村某人家後某坐某向之  
地有某穴前有某石左有某井此可用云云其主  
如其言往見則果然矣人恠之問何以知某地某  
人平生所不見之地名與人名乎曰吾以占知之  
矣人問狀則何以無卦爻之排布乎曰有物告之  
矣人疑其誕問之以堪輿家書則應答如流試以



覆古墳則凡吉凶禍福已狀之事無不一見而洞  
知人以此信而爲神明士夫家靡狀奔走轉相稱  
道余聞之殊可笑也大凡地理微茫固不可盡信  
况可以虛謊誕妄之說遽信其人乎設令此人洞  
悟山家之妙則山之真假或可知之而又何以逞  
言其地名坐向耶此則或可以占知之而所謂有  
物告之者何言也此不過俗所謂接邪之類也不  
出數歲其本末透露無餘願何足信哉

水滸爲書其命意排鋪恍惚奇巧於人情物態寫得  
逼真可謂稗說中大家數也狀所謂梁山伯一百



單八特假說之言耳非真有此等人亦非真有此等事也其出處死生惟在作者之伸縮則宜其始終事竊巧相湊合畢竟善爲之辭而如李達母之爲虎噉死小衙內之見殺於李達等事令人見之慘毒悲切直欲掩卷宋江等諸人之齊會梁山也雖其抗拒天兵剽竊恣橫而觀其豪傑雲集結以義氣者豈不盛哉而及其歸順以後如燕青李俊等四五人外無一人善終或沒於戰陣或死於非命或困於譖害分離凋落曾不得一日而安其所則又何其悲也是以自報安以後見其諸將之次



茅淪沒則使人痛心却自厭見此等處蓋爲一篇  
大欠也未知此何人之所著述而其架虛之說尚  
且如此其人之慘薄可知矣或言水滸傳西遊記  
所著之人兩目俱盲蓋謂一篇說話出沒神鬼終  
不免造物所忌云爾未知信狀否也

李叅判德壽嘗言天下有可笑事爾余曾以京試官  
往湖南時趙左相文命以金溝縣令李浣以順天  
府使俱以叅試官來會李曾所昧也叙話訖李不  
暇一言卽誇其能文自謂幼好莊馬讀兩書幾萬  
遍其他諸子百家無不歷覽至若宋元以下不欲



掛眼其義氣軒昂談說亹亹余固已知其爲人之  
麁悖及掌試之暇余與趙相拈東坡韻各賦七言  
律趙喜玩人謂李浣曰何不同賦乎李應曰不妨  
卽出草紙小片展在手中嚙眉苦哦汗色被面時  
又佯若下字隨卽削去見之足令人掩鼻吾輩賦  
得五六篇後日已矣矣李始搆出一首而首尾殆  
不成說余與趙相幾不禁大噓世間豈有如許虛  
誕人耶余聞而想像殊亦捧腹李浣卽土亭後裔  
也以東堂出身目不識丁爲人愚悖前後爲臺者  
屢而受人指使貽笑京外今又以能文自誇畢竟



又出手脚其不自知甚矣

崔仁浩來見話間余問曰湖南古稱多方外技藝之人君無或見異人者否生曰否吾未之見狀嘗聞諸人康津縣有某漢遭父憂未葬一日有一居士深夜叩門請經宿而去某漢愍而許之舍諸外廊待之無難色其夜某漢夢其父來託曰吾葬地一聽外廊客無問水火某覺而異之卽走外廊呼曰居士睡乎居士起某漢跪曰昨居士迫夜而請舍吾特愍君無歸許之未曾有求於居士今夜夢忽有異居士豈其人乎乃說其夢居士莞爾曰此亦



命耳與我斃条繩四箇竹某漢與之居士卽出曰  
夕當還待之某漢苦挽之請待曙同往居士拂而  
出至夕乃還曰距此六十里某地得吉地以竹表  
其四隅以繩環之可易尋得耳表外皆石尺寸不  
可上下掘壙數尺當有異石類龜少移之無或傷  
又掘數尺又有石鋪其下以此爲限無敢動也窆  
坎後以異石類龜者安其上則吉矣某漢曰狀則  
葬後其應果如何居士曰君兄弟有病者否某漢  
曰有之妹病癩笄病膏已成瘡矣居士曰過三年  
病者起富不可言矣言訖便出不知所向某漢益



異之明日與弟如其言而往果有以竹表者掘之  
果有石類龜者又掘之又有石某漢大異之乃洎  
日而葬其父不三年其妹與弟果不藥而病蘓又  
數年某漢家得橫財益饒至今稱爲富家吾雖未  
見其某漢者傍郡人傳道之甚詳此非誕也所謂  
居士無或異人耶余曰是信異人也前事而言事  
過而驗非異人而能乎雖非異人其妙於堪輿則  
明矣如我輩雖欲彷彿而一見之不可得其精誠  
所感乃不如一某漢乎殊可恠歎

崔生又言年三十九時喪其配爲營葬地步出十里



地時經重疾行未半氣疲脚軟不堪前少憩踞左  
自語而歎曰嗟乎何時健乎忽傍有僧曰君無歎  
也當不日健矣余視之僧貌甚潔目炯狀而碧若  
有識者余遂前曰師有術乎何以知吾不日健也  
僧笑曰小僧有何術聊欲慰君耳余曰師無我欺  
叩之再三僧拒之愈固余傍睨之有村乃指村而  
佯怒曰彼村吾僕也師不以宗當刼之僧始逡巡  
曰無遽怒也小僧略解相人術以此而知之矣余  
曰狀則相我何如僧注視良久曰君方有制無或  
喪耦耶余心異而佯對曰人有叔姪兄弟遭憾無



恠也何必云爾僧曰以相言之余乃曰師果不妄  
吾喪吾室屬耳僧曰信也相不可逃也前過四十  
年如此此後又當如此如此其已過者鑿鑿竒中  
若合符契余曰師之術工矣狀師非徒相也似亦  
妙於堪輿矣幸無欺也僧拂而起曰小僧忙甚不  
可久坐遂不知所向余病不能追悵狀而歸今而  
思之僧言益驗此亦無乃異人耶其後余里中有  
一友人氣健而使酒其妻有脈踰期而未產友人  
問醫乘夕而醉歸行未半酒上頰卧大道上有僧  
戛過友人怒起而手搏曰我在此爾何乃無禮也



僧注視曰閣內方產苦索卽君何不急歸而困我也友人雖甚醉聞產語驚曰師何以知之僧曰小僧以相而知耳友人曰狀則產男乎僧曰男也友人遂捨而歸妻果產男矣友人大異之爲余言之如此聞其貌卽吾所曾見者也湖南古有碧眼道士之號此僧無乃是耶余曰是亦異人者也遂識之

申伯翼嘗言曾在戊寅年李判書益壽葬其大夫人於楊根吾王父守拙公亦自梨湖墓下往赴其葬夜會于李高陽觀壽寓次伯翼時在傍侍坐夜深



後忽有狗自扉外蒼黃奔入俄而大庖隨後跣入攫其狗於階下而去座客大驚李高陽走入房內傷股於門闕伯翼急避厨下誤落尿盆其餘諸人亦無不顛倒失次獨公凝狀不動徐曰庖儘猛矣李高陽氣稍定謂公曰兄何不避公笑對曰庖苟傷人寧可走避而圖免乎伯翼自言其時心竊服公李高陽後亦常曰洪兄凝重不可當也云吾王父平日定力之深固於此亦可見也

世稱武弁少廉白者此自古而儘狀也狀間有冰蘖之操而卒泯沒而無傳則亦豈不可惜乎吾鄉有



權谷山克仲者卽權江界克升從兄也早登武科  
歷備卽累典郡符官終谷山府使家素貧甚麤糲  
恒不繼性至潔在官一心奉公而已秋毫無所犯  
及爲谷山年又滿矣其弟乘間言曰吾三兄弟俱  
老而貧兄又有三子歸便飢矣何不及此時備數  
頃之士以遺後乎權曰爾何言也今吾百口之免  
於饑亦國恩也此外何敢望也無復多言及歸  
行橐蕭然終不以一芥自随家居數十年窮益甚  
卒不免饑餓而死其三子東西丐食俱不能自存  
噫權公卽一蹶張士爾人不必以廉隅責之也且



自知年老無可望而一轉手之間又可使子孫無  
饑矣猶且不憂其操至死而靡悔若此者雖在多  
識自好之士亦不多得豈不可敬乎狀而世不知  
有權克仲者況知其有如此之操乎重可惜也杜  
陵李子厚

重名世

爲余道之甚詳

宣廟朝睦叅判詹年六十喪耦無子一日公退赴一  
親友家女婚主家方盛帳具待卽日垂旻先導來  
言卽總到半程所騎驚逸方奔突回走矣俄又一  
人忙報卽爲馬所墜已隕命矣滿室聞報驚慌莫  
知所爲主人曰吾女已許人而不幸事至此後不



宜適他乃欲發哀女正色曰身未歸人而乃服人之喪乎父亦不忍迫乃與客謀曰吾女之言亦自有理業已設具矣睦叅判無室可以女歸之座客皆以爲便睦亦許之遂於其日與睦成婚夫人後生子三人俱至大官睦亦年九十而歿 當宁定平地有一良家子以其女許人貳室旣納幣其人遭艱女請于父曰女身已許便爲彼家婦也理宜服襄奔哭父責曰汝未適人何乃出此言女請之愈懇父不得已許其一哭而歸未幾其人又得病死女聞卽被髮大慟父止之曰汝未適人何乃輕



自廢一生乎女哭之不已且將奔哭勢不可遏父  
不得已又許之女卽奔哭服喪三年其哭泣之哀  
服役之勤有踰家人因終老其家十餘年如一日  
前後爲方伯者皆佳其志啓請旌閭 朝家重其  
事不許一道人無不歎惜此兩婦人其所遭同而  
處之相反君子以爲各不悖於義睦氏婦智也定  
平良家女節也智與節婦人之行之難也

楊族壽大來見話間道其先蓬萊士嘗宰淮陽遍遊  
楓嶽漢陰李公時年十三四亦隨往蓬萊有吟漢  
陰輒和之詞藻衮衮應酬如流蓬萊每稱其才敏



漢陰亦自負意未嘗屈至永平金水亭蓬萊有詩  
曰錦石銀沙一掬平峽雲江雨白鷗明尋真又入  
桃源路莫遣漁舟出洞行漢陰遽閣筆曰白鷗鳴  
之明字非先生文章不能下小子意未到也遂不  
復吟蓬萊詩固警絕可誦而漢陰閣筆亦自難古  
人才調之夙成如此

吳判書道一與李判書世華同時立朝吳少負才地  
驟躋清顯李晚而塞屯聲望未著及己巳以後李  
有盛名甲戌更化超授八座吳則位不加尊反居  
其下以此常懷怏怏一日乘醉譏之曰令公資憲



脚之福也李笑而徐對曰公言是矣因作詩曰頑  
物刑脛登資憲玄翁跪膝爲崇祿世人膝步官清  
貴窮達元知在此脚玄翁指玄石朴公以理學作  
相也世人指吳也其詩蓋亦有諷嘲之意焉

朴高靈子受

厚

來見語及求山事吾輩言近來地師

之無人子受曰吾家亦屢年求山未見有超出凡  
流者獨得一僧因占先人葬地此僧頗多異事矣  
吾輩問所謂異事者何也子受曰昔吾曾王父管  
餉公爲吾高王父葬地因一地師占一山於原州  
其地師極贊且曰此山開壙幾尺許必有異石以



此爲限慎勿動搖及其臨葬穿壙則壙心果有一石色青狀如斗諸人皆以爲此有地師之言不可動也吾曾王父獨以爲葬親之地不可不慎石下不知有何物乃置而不見乎遂少舉而見之下有金鮒一雙燁狀有生氣會客莫不異之卽改安其石而金鮒幸得不傷葬時邀其地師問之地師曰吾所以戒勿動搖者此也此山以應言之貴不可言且當速發今吉氣已發百年後當發所幸鮒得不傷此有曾王父所記也今幾七十餘年堪輿家前後見者不可數而皆泛言名山未有明知其有



此事者往在十餘年前吾隨堂叔判書公

名權

在原

州墓下時聞其近地士人某家得一異僧堂叔親  
往見之亟異其為人僧脆甚時又病病當服參堂  
叔饋參不少惜幾至一斤未幾僧病果差來謁致  
謝自此往來不絕吾見其僧年可三十丰姿秀發  
眉妍如畫目瑩然而碧肥膚過白骨幾照澈常以  
一卷書自隨秘之不使人見也堂叔因與之往見  
先山吾與諸人隨之僧周覽龍脉局穴又仰觀天  
俯觀地以指量虛若以尺量物者狀良久曰此山  
如此如此大地也是時方有改蒔草之役堂叔與



在傍諸人議軍丁所入多少僧聞之若有思者問  
於吾曰此山有何役乎吾曰欲改莎草矣僧曰莎  
不必改矣余不甚信聽既歸僧留堂叔家一日從  
容言曰小僧觀令公先山當多子孫多貴人今留  
此竊聞之令公家族黨甚少且顯者獨令公耳山  
定無理矣堂叔曰師試思之何爲而狀也僧曰小  
僧竊有疑者語涉誕妄不敢泄耳堂叔曰試言之  
僧曰此山葬時必犯山家之忌也未知果有之耶  
堂叔乃以曾王父所記語語之僧曰山儘不無理  
此果爲崇也狀而聞有改莎草之役此尤山家所



忌者慎勿輕舉堂叔曰何謂也僧曰不必言茅此山有土役大禍作矣堂叔異其言僧言又多驗遂寢其役其後堂叔福禪一人常守此僧同居一寺其人言一日與僧居有一客來見僧請其一見先山僧以病辭客強之愈切僧拒之愈固客乃大怒叱辱僧狼籍因不辭而起僧俯伏無言良久低聲問曰客去乎不久當復還寺僧曰客居此不遠地今幾入去矣豈有復還理耶僧曰茅侯之言未已其客散髮裸躰蒼黃走入曰活我活我寺僧輩大驚急迎曰有何事有何事也客曰俄者纔出洞口



忽有大虎當前咆哮毀我笠裂我衣左右跣踉有  
若攫我將啗者朕而終不傷殺如此移時韋捨我  
而去故堇得脫還矣僧在傍聞而微莞是必僧有  
異術故作此戲劇云月餘僧病甦余徃見問之曰  
師病已不可爲也豈有所欲言乎師沒將何以葬  
也僧曰小僧何言葬在即君意耳朕葬火不善反不  
如葬山言訖而逝余問寺僧曰僧病旣重有何言  
乎寺僧曰無他言昨夜但囑取火來焚其一卷書  
云矣觀此等所爲豈不異乎吾輩聞之殊恨其不  
及見也近來緇徒中蘊其異術而不出如此僧者



顧亦何限而無由以知之可歎

得見灣尹狀達則康熙方大興民力築城於遼東云  
兵使張漢相新通寧邊而來盛言彼中大亂有兩  
劇賊前後侵攻寧邊與彼境相接張又老将頗曉  
邊事覘知彼中消息而云狀也大抵燕京之太平  
幾八十年胡無百年之運此固曆數將窮之時也  
苟有真主膺命掃蕩醺穢肅清中原則宗天下之  
福志士之所以日夜引領而俟之者而第念十餘  
年來康熙之顧恤吾東亦至矣是其計隱狀有他  
日責報之意康熙勢窮則我國必預受其患且今



彼人方築城於遼野其用兵之處在於遼東等地亦明矣遼之距我國不過隔一水耳又安知有不虞之變如丙丁之亂乎國家之憂可謂迫在朝暮而廟堂之上一味忤安苟爲目前姑息之計而無一人擔當國事綢繆遠慮之人朝政之解弛視丙子殆有甚焉識者之歎可勝言哉

凡世人務見綱目等書而於海東事則多昧昧焉非徒不知也蓋不欲見焉此所謂趨遠而捨近也近來借得東國通鑑讀暇披閱數次而大抵文甚鄙野記載草略無足觀者世人之不見東史蓋有以



也深可慨矣

東史記自檀君至高麗恭襄王上下不知其幾千年  
矣各占一隅尺寸之土立號定邦者如碁錯殆不  
勝數而檀君以下三韓以前有若鴻濛皆不可徵  
新羅百濟高句麗以後立國最大歷年最久而人  
文亦已略備矣狀高句麗專尚冒強戰爭不息故  
雖其拓地遼海雄視三國而推鹵獷悍特一蠻貊  
之俗也是以終致隋唐之再征勢窮力盡社稷爲  
墟百濟介於兩國之間強不如高句麗政術不及  
新羅東徙西遷規模不立而猶且驕侈無度歲耗



隣釁其卒享六百年之業誠亦幸矣新羅自赫居  
世以後制度儀文頗亦可述今年行一法明年行  
一法至于中葉幾乎變夷而向華矣朕佛法一行  
政教不舉大起寺刹財竭民怨卒至凌弛而不振  
王建以弓裔之將乘時受命統一三韓功業赫狀  
有足觀者而創業之初首尊釋教訓要十條太半  
眷眷於燃燈八閔之事此非所以爲百代裕後之  
謨也是以高麗四百年之間其所發爲政令者非  
創修寺刹則必享佛飯僧以此爲祈天永命之計  
加以昏君代立權臣專擅刑政紊亂紀綱解弛如



李資謙崔忠獻崔顥崔沆林惟茂等諸巨猾首尾  
數百年相繼秉國罪逆貫天神人共憤而爲其君  
者莫敢明正其罪卒使之安享祿位死於牖下百  
載之下令人代憤盖自太祖以下至于恭襄其間  
傳世雖屢十主而槩論其本末則可謂君不君臣  
不臣矣惟我本朝地是新羅百濟高勾麗之地  
也人亦新羅百濟高勾麗之人也而禮樂文物燦  
狀大備規模制度軼隆三代尤重儒教斥遠異端  
其視新羅百濟高勾麗不翅華夷之辨矣此莫非  
我太祖宏謨遠略有以創始於前列祖深仁



盛德有以繼述於後而致之也豈不休哉豈不休

哉

崔顯忠獻之子沆顯之子其後又有金俊林  
衍行惟茂之父廢元宗立安慶君倡惡乎於

忠資○元宗後復  
位蒙古之力也

海東以一隅偏邦當新羅百濟高句麗之時三國並  
峙其他如靺鞨穢貊駕洛等國各據土地爭立名  
號兵革相尋殺戮無虛歲想像當時之事宜若國  
弊財竭人不貲聊生而以東史見之諸國莫不殷  
冒盛強逐歲調兵而兵不乏逐歲興作而財不罄  
粟帛金銀用之如水而我朝撫有三韓海東數  
千里可不臣服百年無戰爭之患宜其兵益強國



益富矣近年以來生民困悴國儲蕩狀一遇凶歲  
太倉告乏八路軍簿虛擁鬼錄不幸而邦有事誠  
不知為計其視新羅百濟高句麗強弱何如焉是  
未可知也

我南陽之洪以高麗開國功臣太師諱悅為鼻祖至

麗末直長府君諱智為十五代其見於東史者五

公二十二代祖禮部尚書諱灌當仁宗朝以沒於

李資謙之亂書十八代祖禮部尚書翰林學士諱

縉當高宗朝以奉使如京書十七代祖三韓三重

大匡南陽府院君諱奎當元宗朝以討遼臣林惟



茂功書十六代祖大匡中贊南陽府院君諱戎當

忠烈王朝以從王出幸書十三代祖判密直司事

唐城君諱

徵

當恭愍王朝以被禍於廩興方之獄

書如二十二代祖禮部尚書府君十七代祖南陽府院君府君其忠清大節勲名盛德炳烺青史至今百載之下令人起慕在後裔亦與有榮焉

申正言指赴燕時廣求臚章篇什佚狀成軸而李安山東淵詩獨超出衆作見者稱爲歷軸詩曰玄叟朝天錄回頭杳百年大家傳翰墨中國有山川痛飲燕虹起悲訶薊月懸興亡天地恨各自祖孫篇



其意致悠遠句法典雅儘不負其名也

申正言即玄軒申相

合玄孫故詩有玄叟語○此以上先君手自抄置以下及下篇添錄

余從妹俞氏婦有至行識見卓狀非近世凡俗婦人之匹且無師授之工而曉解文字蓋奇才也俞兄不幸得奇疾十年未瘳妹氏以此積憂無聊遺棄百事喜令吾輩諸從談徃古烈女括婦之行賢人志士之蹟以至今今國家興亡盛衰之事妹氏從傍聽之輒疊疊不已蓋有他婦女所未解妹氏獨一聞而瞭狀分別其是非者且徃徃有吾輩所未到處也其伯氏朴兄偶寄一詩妹即以謔書和曰



何事吾生久共群秋空夜月悵看雲回首江林霜  
落早可憐鴻鴈欲南分朴兄又疊次以寄妹復和  
曰碌碌自知俗女群作詩何敢若春雲別來江月  
幾圓缺恨殺清光兩地分蓋朴兄詩有愛爾才調  
迥出群新詩靄靄若春雲之語故首句云云其詞  
藻之警絕如此噫婦人之有才者每見侑道  
奇窮鮮能享有其福祿於吾從妹益驗良足悲也

俞公名啓基  
朴公名光秀

大凡宰臣之處于世雖不能裨補國事及其沒也宗  
亦係關乎邦運非以其人死而國遂無人焉蓋其



位卽宰輔也朝廷之失宰輔亦氣毀之不幸焉爾  
失一宰輔猶狀况衆宰輔先後沒於一歲之中乎  
况其中才德真不負宰輔之責者乎今歲親舊之  
遭喪禍者固不勝數而上所謂宰輔之喪殆不下  
十數如李判府事奮趙判府事相愚尹領府事趾  
完尹判書趾仁宋留守正明朴叅判鳳岭李叅判  
大成自春抵秋相繼而沒又聞北伯李台坦瓜熟  
將還臨行遽癘因不起凡此諸台皆是先契之寂  
厚者固不勝其私心驚悼而况又地望才德有不  
愧其職任則朝廷氣毀之盛衰從亦可占於此矣



李叅判德壽道近有李廷燮者臨原台子之第三子也性不喜紛華力學好文不治舉子業常從金三淵遊有時草鞋藜杖放浪山水間蓋非俗士也嘗得見其所爲文數篇皆奇健有法度又於某人座聽其談論頗有識近來少輩中罕見其比譽之殊亶亶不已李卽素未相識又曾所未聞名者而今

龍溪

龍溪李叅判也

言如此其人亦可知也殊可敬服

已未歲李台來寓於清風邑村適當先君蒞任時也仍傾蓋而契許頗密技屢相尋詩札連續

先君嘗教曰少時聞名今見其人儘非虛士也

近有人頗守靜有文一再逢見於友人家且聲聞素熟



常許以雅士矣及其釋褐以來所爲大不滿人意判若二人事無乃進取之心汨其中儕友之言贊其外而然耶此雖若不關於吾身而亦足以取而爲戒矣

吾家求山蓋爲梅阡移窆之計前後經營殆至數十年之久而一未得可意處昨年栗阡新卜之時必欲得兩代安葬之地而畢竟勢迫定用於單穴之處今則不得不更求他處而台州唐洞距栗阡既不遠且是自古云云之地也前後士夫家置標累累相續而特以其穴處壓臨兩班家所謂兩班無



許賣之意故皆不敢生意以至今日而作一空閑之地矣河澄極意大贊以爲此山山勢但欠文明而終不害爲國中大地力勸其定計而穴下家主適又欲放賣其家與岱故吾輩往來栗阡時歷見與之相約矣澄聞知吾家決意欲用忽寢前說以爲唐洞終欠文明以俗所謂山蔭言之不過出一營將而止矣其後又寢其說以爲此山處於新都至近之地恐不無日後之慮吾則有難勸用其後不一月而又寢其說以爲此山自是禁葬之地有識之家決不可用蓋自當初大贊之後四寢其說



而凡所毀譽之者如出二口未則乃以禁葬爲辭  
其意誠未可知也無論澄之毀譽此山價太高以  
吾家家力難於容易辦出畢竟卜得雖未可知而  
吾家平日所以待澄信澄願何如哉誠有一分誠  
宗底意者其爲言乃如是乎若真知其禁葬地則  
其前何爲曰可用何爲曰不過出營將而已也若  
真知其有日後之慮則何爲力勸其定用耶此雖  
三尺童子猶不信誰果以爲然乎大抵宋畱守正  
明家亦澄所親也宋台按節湖西時亦曾置標於  
此澄所知也今其家亦方經營而聞吾家已相約



於家主或恐其先用不得不贖責澄使之沮戲吾家事澄之詐無所出乃出此不成說之言也何以知其然也澄旣以此等說毀此山於吾家則亦當以此等說毀諸宋家而日昨宋校理真明來見時語及此山而吾輩問之曰浩源以爲此山果何如云也宋曰浩源譽之矣澄真以此山爲禁葬則何不於宋家亦有云云耶且澄以禁葬力毀時吾輩問之曰若如此則宋留守家何爲必欲用之也澄曰如彼家何足責也此果成說乎以此見之澄之爲宋地明矣噫人之不可信乃如是乎吾輩雖不



以澄一言爲取捨而其說有不可不卞故漫書之

金汝仲

時筦

來見話間道天下之義理無窮有不可

以臆見斷之者萬一太后弑君而有太子當繼立則爲大臣者當以討逆之義殺后否舍伯以爲太后以臣弑君天下之所共讐也大臣如伊霍則殺之無疑矣余曰大臣當危疑之際主有恃德則率百官告宗廟廢昏而立賢此所重在宗社故也然以霍光事見之當其廢昌邑之時猶不能自廢乃敢以皇太后詔廢之此以宗社之重而又有藉重之地也設使太后弑君則此逆也罪固當殺然有



太子在耳爲大臣者當告于太子而殺之乎抑不告太子直以大臣之意殺太子之母乎由前之說是天理之所不忍而所不敢非所問於太子者也由後之說討逆雖重而將亦置太子於何地也大臣任天下之重雖不必告太子而聲罪討逆然以弑君而殺其后又立其子其國顧何如也討逆之義雖大而宗社之計不亦大乎舍伯曰不然弑君大罪也大臣只知討逆而已他何足論乎余曰不然若皇太后在則當告于皇太后而殺之如霍光之爲也今之所論非謂此也太子在而后見殺則



是后雖弑君又以子而殺其母也以母之弑其父而又從而殺其母其可忍乎此大臣之所宜深慮也舍伯曰不然古者天子在亮闇則冢宰摠百揆而聽政今太子便在亮闇中矣大臣何必告太子太子亦何敢與於其間乎余曰不然所謂冢宰攝政云者特攝一國應行之政而已今討逆之重何如也殺后之舉何等大事也而乃曰太子在亮闇中而不告之乎舍伯曰太后者天下所尊之號也太后弑君則是天下之罪人也何有於太后之尊也余曰此大不然無論太后之有罪無罪尊與不



尊在太子則母也殺太子之母而曰何有於太后之尊此果合於義理乎舍伯曰然則以君而論之當何處焉余曰大臣不幸而當此時則率百官告于宗廟告于太子曰太后弑天子天下臣民之所不共戴之讐也太后不可以母天下臣民太子亦不可以母殺父之母或請廢爲庶人或請廢于別宮太子不從則大臣率百官以死爭之得其請然後奉太子而立之以廢后之意播告于天下則此於義理恐或不悖而得其中矣舍伯曰苟如君言廢后亦大事也廢太后有異於殺乎余曰在子而



不可母殺父之母明矣在臣民而不可后弑君之  
后亦明矣其廢與殺皆天理之大寔也然殺之則  
傷恩廢之則足以當討逆之義而亦可爲全恩之  
道也夫廢后豈不誠大寔禮哉而弑君之后旣不  
可以母天下而殺之則不忍后之則無以伸天地  
神人之讐而春秋討逆之義廢矣故折衷其義理  
之輕重而出此廢而全恩之論太子若以廢后又  
以爲不忍而不從則大臣當以死爭之矣舍伯曰  
不必多言有可以一言決者瞽叟之於舜也太后  
之於太子也有異乎余曰瞽叟舜之父也太后太



子之母也何異之有舍伯曰殺匹夫與弑君罪孰大焉余曰弑君之罪大也舍伯曰然則舜爲天子不能棄其父於殺匹夫之罪以撓皋陶之法至於竊負而逃海濱則太子能棄其母於弑父弑君之罪以達天下不共戴之義乎以此觀之爲大臣者雖告于太子而殺其后亦何傷於義理乎余曰此則不可以比而論之也義理之存於天地間者雖亘古今而不變狀於其間有可行於古而不可行於今者故堯以天下不傳於子而傳之舜舜以天下不傳於子而傳之禹禹則以天下傳之子而不



傳於人堯舜公天下者也禹家天下者也合天下者義理之正也家天下者義理之私也後之人君以天下之傳之子爲義理之私也舉天下而傳之人曰我能堯舜之合天下其可乎是以天下之義理有不能盡龔曰者亦不必盡合於古也以其不龔曰不合於古而謂皆悖於義理可乎大凡吾之意非以討逆不可行弑君之罪不足治也爲大臣者處變亂之際當爲天下宗社之計而斟量義理善處其權權之得中斯不悖於義理矣舍伯終不以爲然汝中亦不知的從余外雖不屈而內不能



曉朕自信姑此識之以待一質於多識君子

更思吾言

終覺不是也

武人金時會卽家親榜中武壯也以禁衛哨官積仕  
近十年今都政得知世浦萬戶知世浦在巨濟絕  
島之地而鎮下有朱朴金三姓大奸也指使鎮長  
如嬰兒意有不合大則謀殺之小則謗逐之前後  
爲萬戶者一無準朔而歸者蓋惡地也金台今日  
別我而去自言此去幸而不死亦不過四五朔遭  
謗而歸初不如不去去又無以糊口不得不黽勉  
赴任云觀其色有憾憾意殊可矜也



凡科之得失數之通塞有未可知者鄭金堤亨益勤  
攻舉業以巨手稱而五十年不利於公車其困跌  
可知也年近六旬得壯頭又以資滿陞通政可謂  
壯矣吳光運得增廣初試見落於會圍未一旬又  
魁菊製同入殿試亦異矣如此者固有前定之命  
爲士者謹俟之而已

吾曾王考議政自星山解紱而歸也帶來其貢生  
中伶俐者三人或使之學弓或訓以舉子業卽河  
漢昌柳後孟都聖俞也河柳俱官萬戶後還其本  
土都官尾署別提居於義洞吾家旧第之側年七



十餘歿獨其妻至今猶存往來無常來輒說到旧時事盖吾家四代旧老也

江西大父

諱得範

教曰和順

諱

附祭當過於再明而

或言孫當附於祖祭時獨奉祖考神主而行祭爲合於禮云未知如何君家必有已行之規故問之耳吾輩奉對曰此誠禮也狀古者祠堂有龕室故神主無櫝只以主身奉安于龕中凡祭則移奉主身而行祭祔祭時亦當單祭於一位而近來則人家祠宇未備旣無龕室而考妣兩位並安於一櫝之內凡於祀享無奉出主身之事若於祔祭時獨



奉一位而行祭則恐涉未安矣吾家昨年亦過祔  
祭而但非宗家設虛位而行祭故果從禮意單設  
祖妣位而行祭矣然主祀之家則並設祖考妣兩  
位恐或不悖於禮也且喪祭從先祖吾家祖先已  
行之規如此云矣



終南漫錄卷之一

一

終南漫錄卷之一



終南漫錄卷之二

戊戌十一月十八日全羅道儒生朴世炯等以 孝  
廟追崇事及九庵配享廟庭事及羨村書院毀撤  
事陳跡入啓 批以追崇之請蓋出於尊奉之誠  
而第曾以此事會議朝堂批旨中備悉予意矣追  
崇之論意非不好而殊涉重大有難輕議書院勿  
毀之命蓋欲使朝家處分務歸得中而是非之明  
固自如何害之有 宗廟事非一人所敢獨議頃  
年喉院之不捧柳百乘之䟽所以重事體使之自  
首責罰之說宗非意思之所及也爲教昨年柳百



乘亦以追崇事陳䟽而喉院不捧故儒䟽中以此  
爲言請責罰其時不捧䟽之承宣云矣

春曹有畫師逐朔取寸之例而近緣右堂之不備家  
嚴獨當課次從傍見之則其氣格生活模寫精細  
雖初學生手亦莫不力模唐畫絕不類中古畫師  
依樣塗采之鄙拙可知末世人巧之益備矣張得  
萬咸世輝兩人畫法竅優前後課茅迭居其首

北漢之築蓋爲國家陰雨之備而城內狹隘終非他  
日得力之所礪洞李相濡又建議並築蕩春臺倉  
舍水門略已創建城則始築而以晷短少停將自



明春復繼築矣蓋蕩春居北漢都城之間地勢低陷尤無益於保障而李相之意以爲若築城於此以接連兩城則雖當守城之日可以首尾相通無敵兵攔塞之患遂排衆議而力主之殊不知蕩春旣築則通三城周幾百里矣自古無百里之城欲守之則無兵可守不守則與無城同不過爲敵兵隱据之所而北漢只益孤危難守矣此其事理曉然易知而前後論者亦多李相終始執拗以爲必成乃已之計蓋自北漢之設十年之間興作不止財用耗竭地部惠廳儲蓄朽狀都民逐歲赴役怨



聲載路無問有識中外上下固已知其為今日國

家大弊矣禮判閔台鎮厚曾亦主北漢之論自蕩

春之等以為大不可日昨陳疏盛言其利害而其

侵攻李相亦頗深緊自上下批命三品以上會

議朝堂初以今日十二月為定矣因藥院陳啓以

王侯近又添損請待後舉行自上依允翌年會

進判府事金領相昌李判府事濡皆以主事之人引嫌不

春則姑為停罷北漢則因存之意陳請批以北

城之意固有在大計既定旋又棄之有同兒戲寧

有是哉至於陽春之諸臣獻議

多言其不便停止為宜也為教

直長李揖以上今年春秋五十九當有耆老所稟



定之舉上書陳請 批以惟我 太祖大王春秋  
六十八耆老所此宗罕有之盛節也今 聖上春  
秋五十有九人子懽喜之心爲如何哉方欲援例  
仰請矣覽爾上書深嘉爾誠亟令本所稟行爲教  
禮曹判書閔鎮厚以宗錄考出事往江都而聞 太  
祖朝則無可據之例又考他朝宗錄故屢日而不  
及復俞 令曰曾因禮曹草記有宗錄考出之令  
而尚不復俞政院問達爲教政院達稟更送禮郎  
使之催促依 達○禮曹判書復俞後請對入侍  
時 上曰 太祖大王八耆老所事璿源譜略旣



有所錄本所亦有文字世子縷縷請之 聖祖盛  
事今可趾美且此事元非可謙之事故頃者已許  
之矣今考宗錄 太祖以下無載錄之處既無信  
史可據則今日舉行不可矣判府事李頤俞以爲  
若全無一事則 東宮喜惧之情羣下之心莫不  
缺然稍待証候少間日氣和暖時會耆老所諸臣  
於便殿親臨錫宴亦爲盛事云此言好矣擇日舉  
行事分付可也○密昌君檄等以日昨 筵教中  
還寢入錄耆所之俞上䟽請更俞舉行 批以聖  
上念余喜惧之情許入耆所不勝歡忭矣昨於



筵中以信史無懲遽寢成侑歡忭之餘缺然當復  
如何更卽竭誠申請而輒以不載宗錄不許缺望  
愈甚抑鬱度日爲教○延初君延齡君率諸宗班  
以耆老所事上䟽陳請 批以此事元非可謙故  
卽允世子之請矣厥後還寢成侑以其不載宗錄  
也世子之缺狀申請愈往愈懇而爾等多宗之言  
亦如此仍又思之 太祖大王西樓書諱之事載  
於沈喜壽耆所先生案重修序文中今茲文字決  
非杜撰且先祖朝去古未遠而晚年亦嘗擬待六  
旬之至追踵 太祖故事則尤爲明的而䟽中以



爲是將並與 太祖大王盛事懿蹟永泯於來世  
云所論甚是依前下教舉行爲教○領議政金昌  
集禮曹判書閔鎮厚請對八侍時金所達 太祖  
大王八耆老所之事流傳已久故相臣沈喜壽及  
金堉序文中所著似有援據然而宗錄不載之故  
至寢成俞 王世子兩王子抑鬱之懷羣下缺望  
之情極矣幸因兩王子及諸宗臣陳跡蒙允復許  
舉行盛儀一國臣民之慶幸當復如何茲事非但  
槩見於兩相臣序文故晉平府院君柳根所撰故  
相臣李元翼賜几杖序有曰 太祖大王降屈至



尊親臨斯會至作者老所軸御諱親筆莊之本所  
龍蛇兵革以後三十年故蹟蕩然無存云此二臣  
俱是壬辰以前之人必有所目覩而記其事此足  
以懲信當時 聖祖之降屈而入在耆所諸臣固  
爲曠代之榮耀而自 太祖視之不過爲一時之  
好事故似無稱慶之事矣卽今 聖笑霸長趾美  
盛事比宋三百年來所未有之慶且以王子䟽見  
之有 宣祖大王亦嘗擬待六旬之語而今我  
聖上受天永命躋于耆壽追 太祖已行之典成  
宣廟未及之志其承祖宗之行慶享霸休於無



彊者視 太祖創行之日尤宜有所鋪張以此觀  
之稱慶之舉斷不可已也閔曰茲事非但我朝三  
百年所未覩者史籍亦未之有而特以自下不敢  
直請降屈之故方用抑鬱今有許入之侑喜忤之  
心曷有其極但節目之間無可考據茲敢請對仰  
稟矣耆老所奉安處所如或有傷圯處則爲先修  
理而新造冊子精加粧璜別擇吉日承旨及本所  
堂上一貲奉詣殿廡書以尊號 殿下某年月日  
八云云而自 上方有眼患似難親寫代書之人  
亦以善寫朝士啓下宜當旣寫之後具儀仗奉安



於本所又擇吉日告廟陳賀而設科又是次第應行之事也凡慶科或設增廣或設別試而別試有六百三百之別增廣有大小之別或有設庭試之規今番則以何科舉行乎至於進宴則頃日八侍時已爲陳達而今則尤不可已亦當擇期更稟矣耆所諸臣賜宴之俞行於進宴前乎後乎此等諸節皆當明白定奪矣金曰小臣亦幸居耆所故嘗見先生案當初御筆親題之冊旣失於兵燹之中其後追書奉安本所矣今若依禮判所啓新造冊子謹書 太祖大王廟號其下謹書 聖上尊號



則豈不爲我朝美蹟乎閔曰大臣所達好矣俱非  
一時事似不當連書首張謹書 太祖大王尊號  
第二張書 當宁尊號恐爲得宜矣 上曰然矣  
奉安處修理書於新冊具儀仗奉安並依爲之予  
之眼患如此何可寫乎金曰然則使善書朝臣書  
之亦好而臣意則 聖上以眼患不得親寫則  
春宮代寫豈不爲貴而自下不敢仰請商諒下教  
何如 上曰親自寫之則好矣而不能視物況可  
書之乎使世子代書可也閔曰然則 世子當於  
御前書之矣 上曰然矣告 廟陳賀事依爲之



而科舉則以別試舉行可也金曰以前例言之卽位三十年稱慶時猶以增廣設行況今日之慶較重於其時者乎別試則似輕矣宜以增廣定行矣閔曰登極三十年設增廣案倣宣廟朝故事而其時取三十三人矣大臣之意蓋以別試爲輕欲行增廣矣上曰三十三人增廣爲之可也○傳曰太祖大王八耆老所後凡扶造入之事至今流傳此一款令該曹稟處

己亥正月二十七日

耆老所吏胥稱以藥房色丘詣差門私問安正言魚有龍叢啓請囚禁科罪當該堂上推考答以稟



于大朝而處之爲教矣晚後令曰稟于大朝則教以此事元非可罪堂上中有三大臣則請推允涉未安云云

忠清道伯以延豐縣覺淵寺佛像出汗亭啓聞殊異此災也古史亦曾有之未知其兆之如何而近來變異之稠疊如此識者之憂可勝言哉

胡勅入來副使卽昨年春以副价出來者性貪徵索無馭曾前胡使中寂甚者而有寵於康熙彼人以我國爲饒富故今年又以副來蓋我國之待胡勅素豐一經使行所費夥然胡使歸時囊橐充溢必



滿慾而止彼中頒使外國時必以我國爲爭者以此也境外專對國之所重而其擇使如此彼人之政令從亦可知也○王世子爲宴饗胡使駕幸南別宮而胡使無端生怒牢卧不出又改問上禮時自前已行之規徃復爭卞終不回聽日晚後不得已稟于大朝而勉從之此特節目間小事耳其從不從雖若無甚有関然言出胡使不能違拒事尙勉强殆同僕隸其爲辱國大矣可勝痛哉世子還宮後侍講院諸臣以此陳疏請伏辱國之罪優批以答○自有勅以來貪墨無恥未有



甚於今番胡使而辱國亦極矣上而宮衛諸臣  
下而譯舌輩不善從中周旋至使胡使恣意凌踏  
無所顧忌我國力弱旣已服事則亦無奈何而凡  
有血氣之奮者其爲痛惋可勝言哉執義李鳳翼  
陳䟽請罪罷其時陪從宮臣不允

禮曹以仁章里遷葬時王世子當有三度望哭之

節稟達仁章里卽張姬嬪葬地也三度望哭卽出  
柩發軔安葬時望哭也此當然之禮無可論者矣  
持平金鎮商陳䟽因伯魚之事以爲王世子旣  
已上承嫡統則於私親不當復有此等儀節也且



以爲若於仁章里遷葬時有三度望哭之舉則萬  
一翼陵明陵有移窆之事王世子又何以  
加其禮乎批以令該曹稟處該曹請議大臣處  
之諸大臣皆以不可不望哭之意回達蒙允矣  
大抵憲臣之意自以爲得王朝嚴嫡統之義而有  
此疏也然禮者不過裁制人情之所當然而望哭  
非大段服制之比也王世子雖上承嫡統若於  
仁章里旧壙旣破屍柩出地之日晏然無望哭之  
舉則此於人情安乎不安乎他不暇論卽此一節  
可知其情禮之所當然而今憲臣抗章陳請有若



別立意見者然殊涉過矣○仁章里移葬蓋緣昨  
年咸一海之陳跡一海卽江陵人也自以爲明於  
山理進一疏極言仁章里山勢之不好且以爲壙  
中必有水火木根虫灾其所爲言多涉凶悖故朝  
議驚惶其時大臣趙相國泰采建白請博詢諸師  
別擇吉兆而改葬及其破墳也原無水火木根虫  
灾之變壙中略有湿氣此則數十年入地之柩理  
固然也觀象監都提調金相國昌集以草記陳請  
以爲一海前疏所稱壙中之變今皆無驗其妄陳  
危言驚動君父罪固無赦且旧山新山遣諸師看



審時一海手本皆令書吏代撰其不文可知而前  
日所進之疏其有指喉亦明矣亟令刑曹嚴加刑  
訊且覈其指喉之人自上依允

以特旨除右尹任陞爲知中樞俾叅錫宴任以年八  
十今年二月陞嘉善又以耆老推恩陞嘉義今又  
以特教陞資憲入耆老所可謂異數矣○今日卽  
親臨錫宴日也宴罷特命諸堂於耆老所設私宴  
可謂盛事臣民之慶何可言

四月十八日

持平金民澤啓罷判敦寧崔奎瑞其言槩以爲崔本  
以科目出身歷踐清要中年以後無端退歸辛巳



國恤不叅哭班近以 聖候未寧連設候班而亦  
一不進叅進退無據分義掃如云無論事之是非  
以廉退而遭彈劾古未有也崔之休退也未知有  
何可退之義而假曰真無端退去斯固難矣易進  
難退恒人之情一生乾沒顛頓狼狽恩眷衰薄侵  
辱畱至而猶且係憲名塗白首未休者滔滔皆是  
也於其間有能脫然獨超一朝納祿而去則雖非  
古君子中正之道亦不害爲急流中勇退人也當  
今之世如此人豈易得哉而臺臣乃反執此爲言  
末路行身其不難矣



自前信使未行之前倭人例至萊府講定節目我國  
譯舌若因事渡海則亦乘便講定以來者卽古規  
也昨年馬島忽創異例請專爲節目一事入送譯  
官東萊府使徐侑淵以此狀聞廟堂許之送堂上  
譯官韓後瑗使之講定節目萊府因答送書啓島  
主不受又請得禮曹書啓蓋彼人親至萊府講定  
節目則權在於我國故倭人以此爲歉別生異意  
而旣得其請則又欲以此爲日後之例萊府書啓  
徃復非 朝廷所知不足爲他日援引之證故必  
欲得禮曹書啓者此也東萊府使以爲爾島初旣



有書於本州則本州當答之禮曹豈有督答之事乎島主終不聽乃追送書啓於禮曹廟堂不得已許之正言申摺陳啓以爲此極涉顛倒不可曲從倭人之請屢啓不允臺啓未停則禮曹不得送書啓書啓未送之前使行又不得發舡矣大抵此事廟堂旣兩失之臺言固宜然到今褒改豈不亦失信乎況使行旣離之後因此一事屢日淹滯則吾輩私情之悶切姑無論列邑厨傳之弊又何如哉而前後爲臺者不知事勢之緩急一向爭執無意停達矣今洪正言鉉輔始停殊爲台私幸也



承旨俞崇持公事入侍時 王世子厲聲曰昨今日

承旨趙榮福當為入侍而無端呈告不為入侍分

義豈容如是乎承旨退出文學李重協進曰羣下

苟有罪過則明其罪狀直令拿罷無所不可何必

過加聲色反有乖於使臣以禮之道乎臣恐 邸

下涵養工夫猶有未盡伏願 邸下加意也 答

曰諸臣並退出承旨以下送退閣門外已而復

令入侍傳曰前東宮有傳教而諸承旨聽聲舉行

令司謁還收因此震怒有此嚴旨云而此亦傳聞未能信也正言申指上書進

陳戒之言 答以可不留心為教後日 傳曰日



昨叱退承宣寮是無前之過舉也臺疏既發直救之端而論思之地尚今泯默誠可慨然也修撰南一明投疏徑退疏末進陳戒之言疏入不下批

旨特禽遞差

疏中有警責於人所不知之中何必別從容

下諸朝紙等語

○副校理金雲澤副修撰趙尚健牌

不進罷職傳旨

傳曰昨者匪怒之教出於誨責

不須過嫌南一明之疏語全然爽寮且備忘本意

欲使世子無過出於愛世子也而疏末挿入之語

尤涉未安故踏啓字以下則於金雲澤等兩臣亦

無以此引嫌之端矣只推使察任○司諫李鳳翼



陳䟽進戒 批以寸於兩儒臣只推備忘中明示

予意矣驚惑二字寔是萬萬意思之所不到而爾

言如此何必持難昨日備忘還收焉

李䟽有丞收昨日備忘以

副中之語

正言洪鉉輔陳䟽請追復皇甫仁金宗瑞兩臣官爵

自上俞令該曹收議于大臣六曹侍從臣後稟

處大臣以下皆以當復獻議 上以有妨碍於靖

難之功俞勿復官只令銓曹收用兩臣後裔

己亥六月二十日朝大雨雷震大聖殿前檜樹聖廟

卽士子藏修尊奉之所而今有是灾可畏○領相



金昌集陳劄以爲向日聖廟雷震之變未必不由於近來士習之不美居齋儒生輩因此捲堂自上特命同成均閔鎮厚勸諭以入儒生不爲還入書進所懷以爲大臣居燹理之地不能燹和陰陽故致有此無前灾異灾異之來責有所歸乃反誘之以么麼士子輩之所召必也雷震政府之樹然後大臣任其咎乎領相引入不出

年前魯西

尹宣舉之號

毀院之論旣發而䟽陳其不可者

相絀被譴趙泰億時爲禮曹叅議亦陳一䟽盛論此事且伸救被斥諸臣而館儒之䟽反攻趙䟽以



爲趙之父嘉錫曾於丁巳年爲九庵陳䟽被竄今  
其子一反其父之論云云趙於其時卽坐罷經年  
不叙今年夏始除判決事其辭職之䟽兼附對卞  
儒䟽之意修撰趙尚健又上書論斥且陳毀院之  
請出於台共之論宜卽準許云云初 答以趙泰  
億事處分已定所論正矣毀院事亦依臺啓許施  
爲教俄又 下令曰趙尚健書答中毀院一事以  
決不可依施五字改下云云趙泰億被論後再䟽  
之 答初以誣罔之言何必深嫌爲教俄又 下  
令曰誣罔二字以儒臣二字改下云云此二䟽之



答俄頃之間既下旋改而其旨意判然相反故當  
初泰億疏批始下朝議頗洵洵未久而有改下之  
令洵洵者亦復貼然近來彼此所以晝夜疑懼計  
度者如此

書狀趙彥臣遭彈遞近來花駱分黨之說大行於世  
前吏議洪啓迪卽花黨少輩中主論者也趙彥臣  
以兼臺疏侵之洪以此臨政而遞故臺臣惡之引  
他事駁遞使行拜表只隔數日以書狀之改差退  
定於後

正言申指陳啓請罷均田使尹憲柱之任丙申秋







就故廟堂之主其論者欲專委一人使無橫議阻  
撓之弊也刑曹叅判尹憲柱爲湖西均田之任申  
指駁啓以爲憲柱耽嗜酒色曾按湖西有失儀貽  
笑之舉不可以量田重任委諸此人蓋憲柱附托  
時議濫躋宰列而行已鹿鄙且乏才具均田使之  
任竊出時望之外也申指乃採合共之議而論啓  
之物議頗以爲快夫我國田政紊亂賦役不均至  
或以數十年陳旧之田而歲徵一等之賦新起膏  
沃之地而多漏於量案則非但國家稅入之日縮  
生民之倒懸亦已極矣一番厘整固所不已者而



以近來泮浚之人心以近來頽敗之紀綱以近來  
凶荒饑饉之餘其可望整頓七十年未整之田政  
乎況以如尹憲柱者充差於均田之任而廟堂猶  
冀其速了而善成其亦可笑也爾副提學李緯為  
嶺南均田使大  
司成金在魯為湖南均田使判決事  
洪錫輔代尹憲柱為湖西均田使

八月十四日醫官入診時 傳曰水刺戢進近來特  
甚寢睡無異全失中氣虛弱而然耶近來聞風便  
門閉之聲輒為驚跳至於不時咳聲亦為驚跳或  
寢睡時驚跳矣日者二巡摘奸時政院使令呼兵  
曹之際齊聲齊發有若鼓喊者然其時困惱方甚



乍爲假寐而猝然驚悟跳動矣甲午年病重時亦御此堂距外甚邇而其時則閉門時出金之聲少低僅可聞矣子病漸久而歲月愈久人心漸不如初自爾狃安矣近來則宗狃安矣甲午年則子病雖重乃元氣未虛猝重之病而近來則病勢彌久水刺全廢豈可比之於甲午年乎余病豈可望其差愈耶只待日矣脉則不可信矣大限當至以下傳教不敢書矣又爲下教曰人心狃安矣不必言此事彼事而非一事二事矣人心狃安矣承旨慨然矣余今不言則今月內二巡摘奸必爲如



前故余不得已 下教矣如是再三 下教之際  
天顏頗變玉音嗚咽頻頻搖扇嘿嘿咄嗟良久又  
下教曰野俗矣野俗矣

九月二十八日 上出御外殿受進宴今春 上之  
入耆老所也大臣建議請設進宴以 上候未寧  
且值年凶未蒙 允可頃日自 上下未安之教  
領相金昌集藥院都提調李願俞八侍時復申前  
請始蒙 允而內宴因 壺殿之教不爲設行八月  
十四日 醫官八侍  
時有未安之教

二王子延齡君以病卒 上卽下傳旨欲親臨舉哀



彖院以靜攝中決不可勞動之意再啓不允王  
堂上劄政院陳啓力請其停止又不允內殿  
下教曰自上強欲親臨當此時動駕於喪家則  
聖候必有所傷自內無以爭止惟望大臣力爭  
停止之外無可奈何他大臣率諸臣請對必期於  
挽回天聽可也彖院提調及時任原任大臣政  
院三司請對入侍力陳其不可動駕之意上乃  
允仍命特遞金演都承旨之任出去延齡君喪次  
看護凡事○傳曰禮葬等事卽速舉行而該司官  
員躬親進排俾無未盡之弊事着宗分付



庚子四月二十四日入診時 上御隆福殿都提調  
李頤命曰俄者入侍醫官先爲來傳今日諸証候  
有加而以豆湯進御後腹部澎脹有加中氣甚不  
平 下教云臣等亦欲請入侍而只恐應接有難  
而不敢矣因 下教今方入侍而其間諸証候比  
豆湯初進之時何如 上曰無所愈矣都提調曰  
脹候外雖不覺有加而內則甚爲澎悶乎 上曰  
唯都提調曰以氣甚不平 下教抑以滿悶而然  
乎抑中氣爲病之所崇而然乎 上曰呼吸甚不  
平氣眩脊滿矣又曰每卧則氣欲上衝咽喉矣都



提調曰請令初入侍未診脉醫官診察何如 上  
曰唯提調閔鎮遠曰病候如此之時若難於卧則  
或以衣襖之屬積疊於後而側倚而卧則似爲便  
好矣 上不答方震夔<sub>醫官</sub>診曰脉度左則微而弱  
右則微而無力矣李時弼曰脉候右則沉而無力  
左則微而帶數矣李徵夏曰脉候左則去來促而  
無力右則沉而無力矣都提調曰眼部則不爲診  
察乎 上曰唯都提調曰腹部診察何如 上曰  
唯醫官診畢 上曰盡爲診察乎侍宦曰已盡爲  
診察矣權聖徵曰腹部脹候周圍甚廣湊理全然



無紋脹氣直上臚中脚部膝部股陰等處浮氣嬰  
日來指痕亦有加背部亦然矣都提調曰俄者所  
煎入湯劑其已進御乎上曰姑難必進御矣都  
提調曰中氣如此虛憊之時無所補接膈間如此  
澎悶而亦無所踈利者而証候日漸有加臣等不  
知所愈矣一貼湯藥雖難必其進御而卽有顯效  
然小小進御則庶有喜幸之望証候稍間時進御  
何如上曰觀勢當進御矣上曰難愈之疾如  
此之深只待乘化之日矣都提調曰何必如此下  
教乎上曰沉痾凡幾年乎當此積敗之餘非比



一時之病也都提調曰天定但當順受而已思之  
無益而又何以預爲安排必歸之不好乎此過慮  
也臣等豈敢以慰悅之言仰達也其在調攝之道  
亦甚有妨唯期望其差愈可矣 上曰十分中八  
分不可望其差愈矣都提調曰小臣所達之言不  
但 殿下一時調攝之道必以扶持國勢保全萬  
姓爲念期之以全安之道不可念及於不好處也  
上曰甲午年間病患雖非出於積敗之餘而亦  
爲深重故伊時有所思量而書置者矣厥後病愈  
故所書置者仍爲見失而所書置者乃資政殿挾



窄不可成殯必移殯於宣政殿魂殿則敬寧殿移  
安於此闕以文政殿設魂殿可也所書置者雖已  
見失此事卿等不可不知也卽今之病異於其時  
之病更起難矣欲使卿等知予本意故如是言及  
矣都提調曰此等事何必思念乎伏承 下教不  
知所達矣証候如此之時豈可思如此等事乎又  
曰臣等三提調並直近地固無異於設廳但卽今  
事体自宜設廳而患候平復之後卽可輟罷矣外  
間諸議亦以患候如此添加而何不設廳爲未安  
故臣等欲陳達而不敢矣卽今則何以爲之乎



上曰設廳可也都提調曰設廳而患候差愈則卽當輟罷矣 上曰夜輒不能就寢而牖間甚爲悶鬱矣都提調曰 聖候晝則昏困之時多矣凡寢寐有限午寢多則夜睡必減矣 上曰不無睡意欲寐而不能成寐矣都提調曰自 上思慮至此此非調病之道也資政殿文政殿何必思念乎提調曰安心乃調病之道如此思念必害於病患矣心安然後火收熱降矣 進御湯藥若難則語未卒 上曰牖間開利之劑有之乎夜卧則不勝煩懣矣竹瀝進御何如時聖曰竹瀝好矣降氣降火



長服好矣聖徵曰証候膈間痞滯宗宜開利而雖  
一時進御以蘿菹蘘子人參煎進則必有開膈之  
效矣竹瀝雖好而性味似涼必以溫散之劑進御  
好矣都提調曰脹病溫散爲宜故醫言如此矣站  
曰膈間悶鬱非火升也乃脹氣衝上故也脹病只  
宜溫散蘿菹蘘子人參煎進宜矣竹瀝非行氣之  
劑豈可用於此時乎震夔曰竹瀝雖好此時則不  
可用矣脹候用寒涼之劑則輒加矣蘿菹子茶降  
氣消脹人參進御似宜矣時弼曰膈間悶鬱之  
証無他道竹瀝調至寶丹一丸進御則必有效矣



都提調曰至寶丹非涼劑乎徵夏曰此時膈悶非  
熱候乃脹氣上升也脹氣寒劑則不可用必以溫  
散行氣宜矣都提調曰諸醫已盡奏達矣蘿菴子  
茶諸醫多以為好煎入何如 上曰唯都提調曰  
或精神稍愈時招見大臣或思量國事而 下教  
如何 上曰唯都提調曰臣等入侍往來之跽既  
甚回曲而且穿過 世子宮簷階上不安甚矣闕  
內形勢雖未詳知或有他跽可以往來乎曾前大  
造殿出入時自熙政殿後有直跽矣此闕內亦有  
直跽乎若有急時出入之事則即今出入處似遠



思量 下教如何 上曰唯諸臣遂退出○夕問  
安時 傳教曰嗣位日每用清國寶心常未安矣  
皇朝賜本篆畫如昨遂摹刻作金寶藏之以此  
用之

幼學趙重禹稱名人投䟽上陳 慈聖從權之請下  
有母以子貴之語至曰 先王陟降之霸弗弗於  
今日之舉其所為說誠亮邪巧慝有不忍正視者  
政院陳啓極言其矯誣 先旨之狀自 上特下  
備忘記詞旨嚴峻仍令邊遠之配其䟽還出給日  
是

家親以都承旨叅啓左承旨韓重熙右承旨權煥  
右副洪啓迪同副尹錫來叅啓左副宋成明以親



病出

○執義趙聖復陳啓極言重禹䟽語之巧慝

且以為必有指喉之人請嚴刑鞠問不允○大

司諫趙觀彬䟽論重禹之䟽且言承旨宋成明知

幾規避之失批旨有䟽論明快之教○府啓中

趙重禹嚴刑鞠問事依允

允

在庚子七月

承旨宋成明陳䟽極言王堂事及向日承旨黃璿微

稟事批旨以䟽辭大意固好黃璿譴罷之請亦

甚得宜特罷為教矣正言金龍慶繼上章反攻

批旨以宋成明䟽語殊極戾特罷其職為教

進士尹志述時任泮齋以 大行大王誌文中全沒



辛巳丙申

張嬪事

兩年事發疏議方外及居館儒生

皆不叅疏頭人亦不叅而去尹志述以此爲嫌捲  
堂而出大司成勸諭時書進所懷有羣下原無可  
諱之義 殿下亦無可諱之親等語又斥臺閣之  
不卽論啓兩司相繼引避求抄執義宋必垣之引  
避也 批旨極嚴因有尹志述遠定配之 俞  
政院覆啓臺臣疏請還收而始不依 允

聞鄉儒李夢寅持斫刀進凶疏方待俞於 闕下云  
驚駭此輩一自 國哀以來潛窺暗度無所不至  
前後凶書交積於公車而或却而不捧或過數月



未下 批其陰邪鬼蜮之徒計無所出乃又有此  
等前古所未聞之舉其意蓋以爲䟽上而不得請  
則將自斫其頭於 闕下云爾恐動脅迫態誠不  
忍正視也

李真儉以承旨進一疏慘論蓮洞李相且言尹志述  
及趙重遇事聞之多可駭立道良亦危甚矣疏入  
已一望而尚未下 批云矣

聞胡勅稱有皇旨欲徃奠 山陵故朝廷以無前例  
方力爭蓋彼待我之意良亦勤厚矣若屢爭而不  
從則許之似不悖也未知朝議果何以爲定也○



胡勅之留京也托以皇旨請見先大王弟子姪  
強近宗親廟堂以王子病難出入拒而不從胡勅  
又問王子某嬪出娶某氏廟堂不得已書示之趙  
恭考以右議政在果川以家僮進劄力言其失云  
矣



終南漫錄卷之二







